


سحب صيفية



سحب صيفيت

ديوان شعر

عصام أبو عطا



اسم الكتاب: سحب صيفية
اسم الكاتب: عصام أبو عطا
تدقيق لغوي: فريق المكتبة العربية
تصميم الغلاف: محمد إبراهيم
الإخراج الفني: جمال عبدالرحيم
الطبعة / الأولى - ديسمبر ٢٠١٩ م
رقم الإيداع: 23718 / 2019



١١٤ ع جنوب الأحياء - السادس من أكتوبر

Arabiclibrary2017@gmail.com

Facebook.com/arabiclibrary2017

ت / ٠١٠٣٠٣٦٥٨٠١

جميع الحقوق محفوظة

جميع الحقوق محفوظة للمكتبة العربية للنشر والتوزيع، ولا يجوز استخدام أي من المواد التي يتضمنها هذا الكتاب، أو استنساخها أو نقلها، كلياً أو جزئياً، في أي شكل وبأي وسيلة، سواء بطريقة إلكترونية أو آلية، بما في ذلك الاستنساخ الفوتوغرافي، أو التسجيل أو استخدام أي نظام من نظم تخزين المعلومات واسترجاعها، دون الحصول على إذن خطي من الناشر.



إهداء

إلى الشهداء، وبالأخص شهداء قطار محطة مصر، ومسلمي
مذبحة مسجد نيوزيلاندا، ولكل إنسان يعاني على هذه الأرض.
أهدي لكم هذه القصيدة مفتتحاً للديوان..



ضحايا الوطن

دمك مش بس رخيص..

دا ملوش تمن

مهدورع الرصيف..

مهدورف الشوارع..

سلعة للبارع

في قهر الولد..

اللي كان مسافر يشوف أكل عيشه،

أو راجع لبيته..

يطفّي لهيبه وناره..

أو يحضن حبيته السند،

لمحه قطار الغلاية..

وقال له: تعالى..

أساع م الحبايب مية ألف عاجز..

فقتله معاهم،

وخف العدد!

ودا طفل ماشي يشد ف أبوه..

يالايابويا نروح بسرعة،

كرهت السفر..

عايز أروح لأمي.. لروحي..

غريب المكان..

مليان جموع مليها القهر!

ودا أب خايف على ابنه..

حاضنه بإيده،

ونبضه يقوله: عايز تسبني؟!

خدني معاك..

عايش عشانك عمري اللي فات،

فلو_يعني_ حب الوطن

يخدنا لحلم الممات..

يالاً نموت من سُكات..

ونكمل هناك..

حتى هنلقى ضمان للمعيشة..

ومستقبل يليق بحلم الطفولة،

فينا يا ابويا؟!

عشنا..

بعد ما كنا موتى وضحايا..

بعد ما كنا ف رعب وألم..

عشنا وسبنا الجنون!

ودا غلبان مالىة الهم..

مكسور ملوش حيله..

لكنه عنده دم..

يكفيه إن قلبه سليم بيعس..

يكفيه إن جواه شههم..

كل لما يجي ينام..

يجيله منظر الإنسان..



من غير هوية..

كل لما بس يغفل..

يحلم بروحه البهية..

بتندبح إعدام

لكن غموسه..

كتمه إنه يصرخ

بإسم الغلاية..

رحمة بولاده..

تاكلهم الديابة

رحمه بنفسه ف وش الظلام!



ندم وعتاب

كثير بندم..

يا ريتني ما طليت على الشرفة

ولا الشباك..

لا كنت _ أنا _ حبيت،

ولا داق قلبي سنين غربه ،

ولا اشتاق لدفع لقاك..

كثير بندم..

لا عاد جواية شيء قابل يدوس على نفسه..

ويكمل..

ولا _ أنا _ قادر على الفرقه..

افارقك كيف؟!

وانتِ القهوة..

لما تطل علي قلبي..

يروق عقلي بفعل الكيف،

..إدمان مزمن!

بحب الشتا..

لانه الوصل بينك وبينني..

تنزل المطره فتلمسك..

تعدي عليا تحكي لي..

سنين ذكرى..

كنت _ أنا _ فيها السحاب..

لما يتجمع شملهُ بفعل الحب..

وبخبط على بابك..

فتفتحي شباك موارب

وترجعي _تاني_ تخافي..

أنا الخافي..

من كتر ما اتشقق مداسي

لما مشتلك..

عشان احكيلك بإني سهرت الليل

اكتبلك..

لا كنت أنا شاعر..

ولا عارف بمعني الشعر..

تروح إيدي علي الورقة فتكتب بحبك،

وتوصفها..

فيطلع شعر!

كتير بندم..

على الشعر..

لانه حفر صورتك جوه عيني..

وساب فيا مرض الشوق..

روحي اتقسمت مية حته..

ولا عاد ينفع عتاب ولا ذوق!

ولا عاد ينفع ندم..

هي حبة فضفضة لجل نعيش..

ونخفف المحروق!

كفتين حياة

كفة وكفة..

حياتنا بين كفتين..

كفة_ قالوا عنها_ يمين

فيها عاداتنا وتقاليدنا..

مشينا مسالمين..

من غير أي مخاطرة!

نجيب مجاميع ونبقا دكاترة،

وناس بزيادة جادين..

ملهمش في سهره..

جاهلين الحب..

عيشنها فترات ..

سايين اليوم،

وبيشدوا في بكره!

رمين الفرحة بضحكتها ..

لجل الحلم ما ييجي ..

ضريبة.

لجل الناس ماتشفش الخيبة ..!

اصل جنونك والعفوية ..

حاجة غريبة!

وكفة ..

ناسها قالوا: نعيش ..

وبرده نسعى لأحلامنا ..

قالوا عنا: كفة شال! ..

مش جد..

وخدين ع الضحك والتنطيط..

ملهمش ف التقليد..

أو يبقوا زي شخص مثالي حويط..

بيدقق،

فصنفوهم..

ملهمش مبدأ!،

أو مبدأهم رقص و زيت!


كفة يمين وكفة شمال..

وانت المجهد

من كتر الشد من الجانيين

جنب يشدك لنفسه..

وجنب يشدك لنفسك..



جل تداوي الي منها اتشقق

كفتين حياة..

وانت عليك_ إن انت _توازن..

جل ميزانك يتحقق.

إنسان مفقود

حزين؟!

بتحزن علي مين،

وليه؟!

محدث هيكمل وياك..

غير نفسك..

شاك؟!

جرب تاخد بإيديه..

هتلاقي مية حجة،

جرب تقعدع القهوة..

هتلاقي ضحك..

وكلام هتفرح بيه شويه،

ورا الكوليس الكل حقيقي..

بيمارس دوره بدون حرص..

وع المسرح ساعة العرض..

نلاقي..

اللي كان بطلنا يمر

كأنه مجاش

ويعلق جوانا الكومبارس!

فضفض / احزن / عيط / ..

انت إنسان بتحس..

هتتباع لحد متتغير..

وتدورع نفسك..

وسط زحام الدنيا.

فتلاقي بواقى منك ..

فى كل حد قابله ..

هتلاقى مشاعر فايزة ..

والحب الاول ..

الى فتح شعرك ..

هتلاقى قصايدك المنسية ..

بتلومك ..

ازاي قدرت تنساني ..


وانا اول بختك !

هتلاقى حبة صفا ..

وراحة م التفكير ..

هتلاقى يوم وقف عنده الزمن ..

وكانله أسير !



هتلاقي حاجات ياما..

مش موجودة الآن..

هتلاقي الطيبة والعفوية..

هتلاقي الإنسان!

مزاجية الحلم

واحنا صغار حلمنا بحاجات كثيره..

أطفال.. كنا بنحس،

وروحنا بريئة

وأحلامنا بسيطة

نلعب كمان حبه..

نتساوى بين الجيران ف السهر.

مصروف عدنا يزيد

فنعرف نشترى لعبة..

ننزل ف المدرسة فسحة..

وتيجي أيام الشتا

والرملة والزحقة..

والمشي تحت المطر،

زيارتنا لبيت الجدة.

وبياتنا هناك.

...إحساس الأمان و الدفا.

ليلة العيد..

وانتظار الصلا..

احلامنا فضلت بسيطة

لخدم ما زها فجأة الحب..،

وخذلنا..

وصابنا.

وجع فالروح..

مع شوية سقطات وخيبة..

وحزن على نهايات..

كات بداياتها جميلة!

دلوقتي بنحلم بالصفاء..

والراحة م التفكير..

نلاقى اللي شبهنا..

وندور على نفسنا وسط زحمتنا!

ولما ضاع كثير مننا

انطفئت أحلامنا..

وبقيننا نحلم بس نعيش

ولو من غير غُنا،

...لو نرجع قبل عمر خمستاشر سنة...!

لما كنا كل كام سنه نطلع سما

قبل الشهوة متكتمل وننزل ع الأرض..

بنحلم تطول البدايات ..

قبل ما نوصل

لنهاية العرض!

خذلان متكرر

كام مره حاولت تستغنى ..

ورجعت تحن!

تشتري نفسك ..

عشان تبان غالية،

ويغويك الزن!

كام مره قلت أنا _ هنا _ موجود ..

باقي ع العشرة وع الأيام ..

وإن الفرقه والنهية تمنها كبير ..

بتقسم ف القلوب أخدود ..

ميتجمعش!

كام مره ريقك جف وسط هزار ..

فيه الكلمة وجعها الضعف!
 كم مره شلت هموم وكتمتها..
 لجل متبش نقطة ضعف!
 لساك وحيد وسط الناس..
 صدك بعيد ومركون ع الرف..
 لساك مش مفهوم..
 كل ما تختلف..
 يتقال: مجنون وعقله خف!
 فبقيت ملكش غير الفضفضة وياك..
 تاخذ وتدي ويا نفسك..
 لعل وعسى ترتاح..
 فتكوى صوتك حرقه وكسره وجراح..
 خد باله عقلك..

فاشتغل تدوير ف الذكرى..

ويلعن الطيبة..

كام مره قلت: خلاص هبقى مكير..

وتحضر الخيبة،

فتيجي نفسك تسألك:

هو طبع أصيل

ولا تعود على الخذلان..

ولا خايف تفوق م الوهم..

فتتصدم إنك عشت موهوم بدون أحضان!

يا عبيط يا عشمان ف الانسان..

سناريو القصة كان مفهوم..

وانت الي حيت التجربة..

حييت تعيش موهوم!

فصام

قبل مية سنة ..

قبل ما نكون انا وانت هنا..

قبل النفوس ميتنقل ليها الجحود..

قبل الدنيا ما تتحول فلوس..

ونتصارع..

ونقتل بعضنا علشان جنيه،

قبل المصالح ما تظهر للطبيعة..

قبل الوساطة ما تتحول شهادة..

قبل الشهادة ما تتحفظ ..

وتتنسي ليوم الخطوبة!

قبل القصيدة ما تصرخ ..

ازاي..

وليه؟!

قبل المشاعر ما تتباع بالرخيص..

قبل التعقيد والتقليد..

قبل كل حاجة ما تصبح ضحك وإفيه،

الان..

انا وانت تايمين..

لا عارفين إن كنا عاقلين ولا مجانين..

متلخبطين..

بتتمنى فترتنا تمر..

عيشين وسط بشر..

بيكرهونا نعيش..

بيخوفونا م الجاي..

وهييجي الي الجاي،

ويعدي زي الي قلبه..عادي..

مفيش!

شاغلين بالهم بكره هييجي ازاي..

متكبلين ف اكل العيش.

الآن انا وانت الاسم: صحاب..

ومش فاهمين بعضنا..

اصلنا بنكمل بالعدد،

مش بالروح!

أصلنا خايفين..

يتقال: ملناش صحاب

ولو حتى ملقناش الراحة

ف الفضفضة والبوح!

الان حقيقتنا بقت متهمناش..

بتمثل في مية شخصية..

لجل الظاهر بيان محبوك،

أيا صعلوك!

بكره تجرب وتجرب..

ولنفسك تهرب..

فبتسبهاش!

بكره تحن لفتراتك..


وتتمنى إن النهارده مجاش..

عش حياتك كما هيا

فلحياة كجناح بعوضة متسواش!

وانت إنسان..

فإنسى همومك..



اللي ظلمك..

سييه لبكره

فبكره نتيجة للآن!

توهان ذاتي

كل يوم بتسال نفسك ..

عن نفسك ..

أنا مين؟!!

انا كنت إيه ..

والإيه بقيت؟؟

انا حد معروفش وميعرفنيش،

أو شيش ..

كان مقفول ع الناس ..

ولما فتح ..

دخل برد ..

ميدفیش ؟!

مختار بین بکره وامبارح ..

بین الذکری والطارح ..

بین کل أفیش

...تلاقي العرض من بره یشدک ..

وتدخله ..

فتندم ع الطیش،

کل لما تکبر ..

هتلقي حاجاتک الهامة ..

قابله للتطیش!

کل يوم هتدور على جزء جمیل ضاع منك ..

وکان جواک ..

قبل ما يتنسي زي اللي قبله..
 وتتحول لحد مكتتش حبه..
 تلقائي بدون تفكير!
 هتسال نفسك ياما كتير..
 لما الوجه تحدفك لبعيد،
 فلما تلاقي نفسك محاصر..
 بين اربع جهات للمدى..
 مش هتلاقي إلا إتجاه وحيد..
 هو السما.





الآه وما قبلها

اه تنهيدة مش شرط..

تطلع لما حاجة توجعك..

دي وحل اتجمع فيك..

من كام كلمة جرحتك وعدتها..

وكام دمة مسكتها وردتها..

وكام طعنة استقبلتها الروح..

لما ملقتش حد يسمعك!

آه تصبيرة..

للحرقة..

وطبطة للوحدة..

ونعمة لحفظ الوعي..

بنسمعها ف وطننا كثير..

من كل بائس فقير..

محلثوش غير حلمه،

والسعي..!

بنسمعها من الي ملهش مكان يحضنه..

من الي ملهش حق الاختيار..

ورأيه مش مسموع..

من الي واكله الجوع..

والغربة والفرهدة.

آه..

ضحكة بيدارى وراها هموم..

حيلة المظلوم..

صرخة الدنيا..

لما البشر على بعضها تقسى..

لما سواقي الايام تدور..

وترميك بعيد عنك..

لما تبعدك..

عن كل شيء حبيته..

عن الي منك

آه نبرة وجع..

لما تطلع بيطلع وياها نص الالم..

فلما عرف المجتمع..

شلها من دستور..

وضاف مكانها كلمة نعم!!



تفتت زمني

كل شيء اتغير..

بعد ما الأرض نبتت مهزلة..

بعد ما الإنسان بقا شيء..

بيتعوض بهال..

بعد المشاعر ما صارت مزيفة!..

حبة دموع كما المطر مؤقتة

كل شيء اتغير جوانا..

المبادئ والقيم..

السعادة والنغم..

تهنا عن نفسنا..

لما كنا مشيين بنردد: نعم!

كل شيء اتغير تحتنا..

فبعد ما كانت شيلانا الأرض..

شلناها بالهموم!

وبعد ما كنا بندفن فيها..

دفناها ف قلوبنا..

جل المصايب ما يبقي وقتا محسوس..

جل الغموس يتبلع..

بأمان،

من غير مفاجأة _ موت _ حزينه..

تبقى مش متوقعة!

كل شيء اتغير فوقينا..

السحب جواها دم..

والرعد يرعد..

يرعب الغلابة الطيين..

يملاها هم!

فيطمن اصحاب المناصب..

بأننا هيسكتنا خوف..

وإن كبتنا هنطلعه على بعضنا

غضب..

ونتمسح ف الظروف،،

كل شيء من حولنا اتغير

حتى الهوا بقاله لون..

لما لمس البشر..

بقا ليه لونين..

لون النفاق والكذب..

ولون الضحايا الميتين

حتى الطبيعة الي كانت للهدوء والصفاء..

او للحب!

أو لنوم الغلاية الطيبين،

اتغيرت..

بعد ما لقت الناس مليها الحقد

والقسوة..مش صافية ،

ومش ناسيين!!

كل حاجة اتغيرت

والهوا جوى نفوسنا مبقاش..

ليه نفس ..

ينطلق

كل حاجة اتغيرت
حتى الزمن اتفتت..
معدتش زمن..
م الضغوط..
والتلاهي،
انفرط،
بقا زي حبات الرمل..
تايهة وسط الريح..
ووسط البشر!



احتياج عاطفي

جرب بص جوا نفسك..

شوف احتياجك م المشاعر،

واهمله وعافر وامشي ف طريقك..

البارد الخربان..

هتتجمد وتموت ناقص دفا

فمهما شمسك كانت صافية..

ناقصها ناس..

تمله نورها..

كاس يتشرب ف اللقب احضان!

امشي ف طريقك،



واقبله..

الكون باصص عليك..

مهتم بك..

قابل احتياجك، الاهتمام والشوف..

قابل ضياعك والخوف..

وسط دنيا مش عارفه تفهمك!

بص يمين تلاقي بحر مليان حياة..

مليان سمك..

طاير فوقه عصافير..

حابه تطربه بالزقزقة..

فيعلی هديره يغطي على صوتها،

ويقولها: بس بقا

ولا عمرها روحها انطفت

ولا اشتكت..

من نفص الاهتمام..

هاجرت تغنى ف حنة ثانية

تلقي فيها الانسجام،

فارق كل الي مش عارف يسمعك..

يفهمك..

كل الي مش حاسس بمشاعرك..

كل الي مش شايفك،

ولا قادر يقبلك..

هتلاقى _ ف يوم _ سبب..

يشدك ع الحياة..

يملاك.. أمل.





قلب ودليل

كلنا تيهين

والفايق فينا..

طريقه مليون متاهات..

مش عارف بتودي لفين!

ومحتار يدخل أي متاهة..

بتودي لطريق السير المعروف..

طمعان إنه يشوف..

آخر مشواره..

لجل ما سيره ينتهى،،

بقيمة وذكرى سنين!



حب يجرب حظه..

فختار بقلبه متاهة..

وقال: الدنيا حظوظ..

وكانوا اثنين..

اتردد فاختر الثانية..

فاكتشف إن طريقها مسدود..

قال: والله اخترت الأولى..

بس قالولي تعالى معانا وكون مسنود..

الكل اختارها..

متكنش لقلبك معبود!

وبعد نزيف ندم جرى جواه..

بص لقلبه وقاله:

انت دليلي لو مختار..

هتعود بـيك اختار

هنقبل سقطاتنا..

ونكمل تاني..

لحد ما نلاقى الحرية..

حياتنا قرارات

مليانه غلطات.

وبرده جواها حياه بهية.



ألعاب نفسية

يببحروا ويغوصوا..

ف بحورك،

غواصين للنفوس..

سابحين ف بحر تفاصيلك..

بيتسابقوا..

مش لوصولهم..

ليوصلوك!

ليرفعوا عليك الكؤوس..

يوهموك إنهم بيهزروا..

وحاسين بمشاعرك..

وإنهم ع المسرح بيمثلوا..

مش ف الكالوس

تلتفت عنهم..

تلقى الستارة اتقفلت..

فتفوق فجأة م الكابوس..

تلقى الي كنت مصدقة بالمشاعر..

هو هو على الحقيقة..

مش فاشوش!

فتلقى عيونك فتحت..

تلقى ضريبة معرفة..

بتعذبك..

معركة ويا نفسك..

ومين يحوش!؟

تلقى الي منك..

كان بشوش..

أصبح يقولك: عيش لروحك أولا..

فالزمن زمن المصالح..

والي صالح..

هما الوحوش..

عيش لروحك وإبني منها عدة وجيوش،

والي لسه عايشة روحه..

باقية من حرب الأذية..

يجري يصونها..

قبل ماتتحول رهينة..

وضحية..

قبل مايتلعب عليا لعبة غامضة..

لعبة نفسية.



شط العواصف

الورقة بيضه..

والناس بتصب عليها حبرها الأسود..

وإحساسك أبيض..

كما البفته..

بيدلك ع الصبح..

وبحكم فضولنا والتجربة..

بيقتل فينا الورد!

لجل مانتحول شكاكين..

بنحاف م اللي حولينا..

بنخاف إننا نجازف..

أو نبدأ بالود..

يمكن متحيش..

فمتمتع م القرب..

مش لما حينا

وفتحنا روحنا..

لجل يدخلها النسيم..

دخلها التراب..

سدها سد.

فبقينا نخاف..

المد لو مد ايده.. يسرق

فيشدنا جوه بحوره..

ونغرق!

طول ما احنا ع الشط

روحنا بتغني..

ولو كان الموج عالي!

هتتبل أطرافنا..

لكن جوانا عمره ما ينطفي.

معاهدة حلم وطموح

السماء عملت تحالف..

مع الإنسان..

تديني_ كل يوم_ حلم وطموح..

أديك سلم يقربك مني..

يطلعك السطوح..

لجل تشوف القمر واضح..

فتحكيه اسرارك..

لجل وسط العتمة..

يلهمك نوره،

ويشغشق نهارك،

هبت ملوك الحلم!..

سرقة وثيقة السلم...

المحفوظة بين السما والأرض..

خطوا سلم طموحنا بالعرض..

لجل ندورف نفس المستوى!

أخذوا عرقنا شعلة لسفنههم..

خدعونا بالجهد..

لحد ما صرنا عبيد..

جرينا خوف م الجوع..

مش رياضة وهوى.

المعاهدة بنودها اتغيرت..

كل الي ماشي بجناحات اتقصصت..

كل الي رافع راسه للسما..

ظهره انحنى من كتر الإنتظار..

كل الي فتح عينه ع النهار..

كان مطبق ويا حلمه

عينه مشفتش الطريق..

كل الي باعك وقت عوزه..

كان صديق!،

المعاهدة بنودها اتغيرت..

وبقت بتتلخص من كونها..

سلام بنطلعها لحننا..

لسلمة لبيع المبادئ،



وسلمة لبيع الرضا..
لجل محدش يفكر ف الكفاح..
والي فكر يقتنع بسقف النجاح..
والسحب يسكنها الأغنيا
يبنوا عليها الأبنية..
ويصدرونا اللي باقي مع المطر..
معاهدة حلم وطموح مع الوطن..
بتنص: بيع نفسك للمصلحة..لينا
نديك للدنيا تأشيرة..
وحرية سفر!

زيف

دراسة وتخرج وفرصة شغل..

محجوزة لكل الأحرار..

واحنا العبيد!

نتعلم لجل ما نتهان..

لجل ما ننكوي بنار الواقع،

ويتنزع منا الإنسان..

لجل ما يقولوا: علمنا..

وانت الي جاحد بتار!

فينكوا يا فاهمين؟!

عاطلين أو قابلين بأي مكان..

بيوكل عيش!

ليه كنا شطار..

هنموت ع المجموع

واعصابنا دمار!!

لو نعرف إن شهادتنا قيمتها..

ختمين وشعار

لا بكيناع واقعنا..

ولا شاف حزننا جبار

الان بيحطوا فرد سمسار لكل جميل..

سمسار في كل مسار!

لجل يبيعوا الحلم..

ف مزاد لأصحاب المال

لجل ميخلوا الإنسان سلعة تجار!

موضة ندالت

كان لي صاحب حييته..

ملّت من قربنا الأيام..

ففرقتنا..

أو كانت سايبانا نمثل إننا أصحاب

وكل حاجة ليها عمر..

مهما كان تمثيلها صادق،

كل حاجة بتنكشف..

مهما تتدّارى ورا مية باب!..

أو مهما كان تموهها..

فكل م يرتفع النهار..

بيدوب الضباب!



ليه نشيل جوانا..

ونجرح لما يشتد الهزار،

عايشين نحب ف ناس مش بتحبنا..

أو بتمثل إنها بتحبنا لجل المصلحة..

أو يتردها الي بتعمله،

عايشين بتسرق منا المشاعر الطيبة..

ف ضوء النهار!

بيمنوا عليك الإهتمام..

فتفضل تبقى وحيد،

فيقولوا: متعالى..

مش بيعب الناس

وملهش أمان!

طبع الندالة أصبح موضوعة.. بتتلبس!

ذوق كل الي مش عارف يختلف..

جل ما بيان مألوف..

ومش مكروه..

أو مستفز..

جل محدش يكشفه..

ويطلبه بالإنسان..

سهل إنك تعيش متداري..

صعب إنك تكون واضح..

فتواجه.. متكونش جبان!

سهل إنك تكون ألوان

صعب إنك تكون نفسك!

نبض بردان

لما غنى منير: العالم عاقل مش مجنون..
كان أمله إن الانسان يكون ويغنى بحرية..
العالم لا عاد عاقل ولا مجنون حر،
العالم عادي..
ماشي بروقان ولا داري..
والزمن بيمر..
كأنه غريب
بيدور على عالم ثاني..
البرد هجين من الشتاء والناس..
اتولد ف ديسمبر..



لما برج القوس..
 قرر يموت الإحساس..
 ويتعود على الأبراج،
 لما السحب خدت إفراج..
 وطلعت تحضن بعضها..
 وبعدها اتفرقت متطولتش..
 لما الإنسان اتغير فكبر..
 ومدققش،
 لما صوت مشاعرنا لف ولف واحترار..
 ورجع صدى متبدلش!
 فبقينا ندارى..
 بضحكتين ف الوش!
 ولو سألونا تمامنا..

نرمي تمام التمام..

ونقول لروحنا: معلىش..

العادي بتاعنا مكش عادي..

دا خليط م القوة / والفوران / والأحلام / والمبدأ..

وأى شىء ف نبض..

علا صوته فاتعدم!

حكاية قلم

كان القلم صياد يحب يصطاد..

بصفاء وهدوء..

والصيد فن وهبة،

موسم م البرد موت الموهبة..

خلى القلم فى كبت..

خلى الحياة متعبة..

متاعها مر..

خلى نبضنا بردان..

ومهوش حر!